



MONATA GAZETO DE E-HANDIKAPULOJ

INFORMILO 6

JUNIO 2013

Kol.338/29

XX

Enhavo: Dahlen-Baasem, 37-a Skokovy, 100-jara esperantisto, 98-jara membrino de AEH, Interesa monumento Lipnice, Falo de la Romana imperio, Invito al Greziljono.

XX

La 4-a printempo en Dahlem-Baasem

30.3. – 6.4. 2013

La Paska semajno organizita de EsperantoLand sub la gvido de la samideano Lu Wunsch-Rolshoven okazis fine de marto kaj komence de aprilo en



Dahlem-Baasen meze de la Eifel-regiono en Germanio. Partoprenis ĝin malgranda grupo de 12 geesperantistoj el Belgio, Francio kaj Germanio. Ni povis pli bone konatiĝi kaj ĝui agrablajn tagojn en la neĝkovrita pejzaĝo. La feria domo troviĝas en iom izolita loko duonĉirkaŭata de arbaro. Ĝi posedas ĉion por bona komforto de la uzantoj, eĉ naĝejon. La ĉiutagaj manĝoj estis abundaj kaj bon-

gustaj. Por festi Paskon, ne mankis ĉokoladaj kaj koloraj ovoj kaj eĉ bona ŝafidforma kuko. De la manĝejo videblis la vilaĝo Baasem.

Ni aŭskultis prelegojn kaj ĝuis bildprezentadojn pri vojaĝoj prezentitaj de la partoprenantoj. Marcel Delforge rakontis pri sia vojaĝo per Transsiberia

trajno survoje al la Azia kongreso en Mongolio kaj pri interesa ŝipado kaj navigado tra la Danuba Delto en Rumanio. Oni spektis tri filmetojn, kiuj gajnis konkurson rilate al Esperanto. Tre interesa estis filmo pri Sumatro de Jean François Cousineau dum lia vojaĝo tra tiu ekzotika lando.

Liba kaj Floreal Gabalda prezentis filmojn pri Venezuelo kaj ties folkloro vilaĝefesto.



Ni piedpromenis en la proksima ĉirkaŭaĵo, vizitis la urbeton Kronenburg kaj promenis laŭlonge de ĝia lago. En Bad Münstereifel ni admiris la historian centron kaj plu-ekzistantajn fortikaĵojn. Ĝi apartenas al la plej bone konservitaj mezepokaj urboj en Rejnlando. Ravis nin la pitoreska urbo Monchau, situanta en rokeca valo de la okcidenta parto de la Eifel-

regiono en la proksimeco de la belga limo. Marcel vespere rakontis pri aventuroj de Michel Schmitz kaj la gastejo Baraque Michel, kiu rilatas al tiu regiono. En la urbeto Nettersheim ni vizitis la naturcentron kaj ties ekspozicion pri la naturo kaj historio de la regiono kaj poste ni promenis en la ĉirkaŭaĵo. Revane ni haltis por admiri la kastelon Schmidtheim. En ĉiuj vizitataj urboj ni post la promenado kafumis kaj teumis dum agrabla babilado. Por viziti la urbon Kolonjo ni veturis trajne. La stacidomo troviĝas en la apudeco de la mondfama katedralo. Promenante ni vizitis la urbodomon, Mikwe – la judajn ritajn banojn, parfumejon, ĉokolad- kaj mustard-muzeojn.

Ĉiumatene ni konversaciis kaj pridiskutis diversajn temojn: pri paskokutimoj kaj simboloj (ovoj, leporo, sonoriloj), pri diversaj E-aranĝoj en Germanio, Francio kaj aliloke. Oni povis enrigardi fotoalbumojn kun raportoj pri diversaj Esperanto-eventoj, kiujn mi alportis. Aliaj temoj estis malfacilaĵoj kaj lingvoproblemoj. Ne mankis amuzaj ludoj kaj iom da dancado. Vizitis nin du esperantistoj loĝantaj en la regiono. Lu Wunch-Rolshoven prelegis pri klimatgasa kompensado: (kompensado de produk-

titaj forcej-efikaj gasoj), ŝparo de energio, uzado de vojaĝrimedoj, varmigado, aĉetado-konsumado, alternativa energio (suno, vento...).

Ĉe la fino ni esprimis opiniojn pri la semajno. Resume ni povas diri, ke ĝi bone disvolviĝis kaj ni pasigis tre agrablan Pasko-tempon en la bela pejzaĝo de la Eifel-montaro, malgraŭ la malvarma vintra kaj neĝa vetero. Espe-
reble venontjare la printempo venos ĝustatempe por plene ĝui la vekigantan naturon kaj sunplenajn tagojn.



Liba Gabalda

La 37-a seminario en Skokovy

de la 15-a de aprilo ĝis la 21-a aprilo 2013

Post longa vintro ĉe alveno de suna vetero okazis la 37-a lingva seminario en la Ĉeĥa paradizo en la pensiono Espero. Venis homoj el diversaj partoj de Ĉeĥio kaj ankaŭ unu sveda esperantisto. La seminario estis ligita kun „Sabla printempo“, kiu okazis ĉe la fino de la semajno. Kelkaj par-



toprenantoj venis nur por kelkaj tagoj, eĉ estis tiaj, kiuj venis nur por kelkaj horoj. Entute venis 37 homoj, inkluzive de Pepino – agrabla dek-unujara knabo, ŝajne ĝuanta nian medion. (Sed sur la foto nur parto de la ĉeestantoj).

Ne mankis la ĉiumatena gimnastikado, kaj post la matenmanĝo instruado en du grupoj. Posttagmeze sekvis ekskursoj en la naturon,

vizito de la urbodomo en Mnichovo Hradiště, kaj ekspozicio pri genealogio. Vesperaj filmoj kaj prelegoj temis pri la libro „Bona Espero“, UK en Vjetnamio, pri Islando, pri Svedio, pri „Avulino de Skokovy“. La lastaj tri tagoj, sub zorgo de tri instruistoj, estis dediĉitaj al komputikaj instruoj, (tiuj

koncernis la registradon de paroloj kaj kantoj). La estrino de la projekto (nom. „Sabla printempo“) – Pavla Dvořáková – plenkonscie strebas ĉe la esperantistaro (diversaĝa) plialtigi la „komputikan alfabetecon“, sen kiu ankaŭ nia agado ne povas ekzisti. En la lasta vespero venis kunkanti neesperantistoj, kiuj gastis en la pensiono, kaj kelkaj prezentis sin kiel eminentaj gitaro- kaj piano-muzikistoj. Ĝis post la noktomezo daŭris la komuna amikeca amuzado....

Jam nun vi povas aliĝi por la aŭtuna seminario, kiu okazos de la **16-a septembro ĝis la 22-a septembro 2013**. drahotova@esperanto.cz

Jindřiška Drahotová

Centjara jubileo de la ĉeĥa esperantisto el la urbo Česká Lípa

La 5-an de julio ĝisvivos sian 100 jaran naskiĝdatrevenon la aktiva ano de E-klubo Česká Lípa s-ano Antonín Střelba. Li esperantistiĝis en 1958 kaj de tiu tempo li estas aktiva membro de la klubo. En 1.1.2006 li fariĝis prezidanto de la klubo. Helpe de liaj sukcesaj ago-



doj ĉe urbestro, nia klubo gajnis la eblon senpage kunvenadi en pliaĝula hejmo kaj poste en urba azila hejmo. En sia aĝo li estas vigla klubano kaj partoprenas regule renkontojn de la E-klubo en Česká Lípa, eĉ komunajn renkontojn kun geesperantistoj el la apuda urbo Nový Bor. Ni, geanoj de ambaŭ E-kluboj, esprimas al s-ano Střelba okaze de lia solena tago niajn sincerajn bondezirojn de ĉio plej bona, precipe de bona sano ankoraŭ por multaj pluaj jaroj.

E-klubanoj el la urboj Česká Lípa kaj Nový Bor, inkluzive de la redakcio de Informilo.

98-a naskiĝdatreveno de AEH membrino el Hlinsko

Mia onklino s-ino Anna Picková komisiis min respondi vian leteron de la tago 5.4.2013. Ŝi tre plezure plenumas vian postulon, estimata sinjorino Rýznarová, kaj ŝi sendas kelkajn vortojn pri si mem.

Ŝi naskiĝis 3.6.1915 en la urbeto Skuteč, do en la unua mondmilito, en la Aŭstro-Hungara imperio. Ŝi rememoras, estinte trijara knabino, la forigon de la blazono de aŭstria aglino el la tiama justica domo.

Esperanton ŝi eklernis nur kiel **sepdekdu-jaraĝa**, post kiam ŝi legis anonceton en la loka ĵurnalo partopreni skriban kurson de Esperanto, gvidatan de s-ro Karel Franc (kore ŝi salutas lin). Post esperantistiĝo ŝi akceptis proponon de la E-klubo Pardubice-Dukla iĝi anino de la klubo. Ekde aŭgusto 1987 ŝi regule unufoje en semajno vizitadis la klubejon en Pardubice. Ĉiam

ŝi vojaĝis je la dekseka horo per trajno el Skuteč al Pardubice kaj revenadis unu horon antaŭ nokto-mezo. Post tri jaroj ŝi konstatis, ke la vojaĝo ne estas tre sekura por ŝi (post amnestio de la prezidendo, liberigitaj krimuloj denove faris krimojn). Tamen ŝi de tempo al tempo partoprenis diversajn E-aranĝojn. Ekzemple ŝi rememoras viziton de la tombo de doktoro Schulhof en la juda tombejo Pardubice, alitempe ekskurson al la vilaĝo



Kočí ĉe Chrudim kaj viziton de la fama ligna preĝejo kaj de la vidindaĵo Tři bubny (Tri tamburoj). Ŝia patrino naskiĝis en Kočí, en dometo rekte kontraŭ la preĝejo. Kiam oni malfermis la pordon de la dometo kaj samtempe la pordegon de la preĝejo, oni povis vidi la altaron.

Proksimume en la jaro 1989 ŝi vizitis la E-rondeton en la urbo Svitavy, okaze de la ekspozicio pri E-agado. Kaj tie ŝi konatiĝis kun Jarmila Rýznarová, kiu tie rakontis pri sia vizito en Francio kaj montris diapozitivojn.

Ĝis hodiaŭ mia onklino ricevadas kaj diligente legas la Esperantajn gazetojn Informilo de AEH el Pardubice kaj Starto de ĈEA. Jam trifoje ŝi sendis financan sumon por subteni ilian agadon. Eĉ nun, 98-jaraĝa, ŝi rakontas pri la historio de sia loĝloko Hlinsko, kompreneble Esperante. Kaj kiel aldono ŝi kantas kelkajn naciajn kantojn, aŭ kristnaskajn kantetojn – ankaŭ Esperante. Pluajn sukcesojn deziras al Via asocio ankaŭ ŝia nevo Jiří Pražan.

Tradukis Pavel Nechvíle

La estraro de AEH sincere deziras al nia membrino pluajn jarojn en bona sano kaj kontento.

red.

Interesa monumento

En la vilaĝo Lipnice n/Sáz. (ĉe la rivero Sázava) la **27-an de aprilo 2013** estis senvualigita monumento de Jaroslav Hašek, (aŭtoro de la fama verko „La brava soldato Ŝvejk“) okaze de lia 130-a naskiĝdatreveno. La senvualigo estis kroma programero de la gravega internacia konferenco de hašekologoj, (kiu okazis en la vilaĝo mem). La partoprenon de la senvualigo organizis nia Ĉeĥa E-Asocio kun E-rondeto Pelhřimov; do ni estis kelkdekaj esperantistoj.



Niaj legantoj povis jam legi en la Informilo n-ro 4 pri la grandeco kaj pezo de la skulptaĵo (farita el la loka „blua granito“).

La vizitantoj unavice rigardis la estintan dometon de Jaroslav Hašek, kiu nun estas aranĝita kiel „Rememorejo de J.H.“



Antaŭ la ĉefa programo de la senvualigo de la skulptaĵo (kiu okazis 2 km de la vilaĝo, sur granda herbejo) ni, esperantistoj, estis akceptitaj ĉe la vilaĝestro (eĉ kun refreŝigaĵoj!) kaj poste ni komune plantis kaŝtan-arbeton sur la vilaĝplaco de Lipnice, kiun prizorgis la membroj de E-rondeto en Pelhřimov sub la gvido de Max Kašparů. Ĉe la malkovro de la skulptaĵo la kreintoj (desegnistoj, skulptistoj) parolis pri la elĉerpiga laboro. **La nepo de Jaroslav Hašek – inĝ. Richard Hašek – nome aprezis esperantistojn pro ilia financ-subteno de la projekto.** Kaj tio okazis antaŭ la kelkcenta

amaso da vizitantoj, kiuj partoprenis la instalon de la skulptaĵo.

Margit Turková

Ĉu por rideto aŭ ploreto?

Falo de la Romana imperio

Edward GIBBON (la 8-a de majo, 1737 - la 16-a de januaro, 1794) estis la plej influa brita historiisto ekde la epoko de Tacitus (mortis 115). Lia ĉef-

verko, The History of the Decline and Fall of the Roman Empire (La Historio de la Dekadenco kaj Falo de la Romana imperio), unue eldonita en 1776, estas gravega verko, kies influo ankoraŭ nun montriĝas. En ĝi li taksas la kaŭzojn, pro kiuj en la jaro 476 falis la Romana imperio tiel ĉi:

1. Plejparto de la loĝantaro preferas amuzon anstataŭ laboron.
2. La tradicia rolo de patroj kiel vivtenantoj de la familio estas dubigata, multobliĝas malordigitaj rilatoj kaj fraŭlaj patrinoj sen patroj.
3. Grandaĝuloj estas neglektataj. La homoj zorgas pri hejmaj dorlotbestoj pli, ol pri siaj maljunaj gepatroj.
4. Literaturo kaj arto fariĝas neinteligentaj, estas kreata fienhava amuzo. Tiel nomataj artobjektoj estas malbelaj, sengustaj, nenion dirantaj, sed tamen de la riĉuloj aĉetataj por grandega sumo.
5. Honora militservo al la patrujo estas rifuzata, pridubata, primokata kaj fine per la leĝo nuligata. Militistaron formas dungitaj solduloj.
6. La homoj diligente laborantaj estas primokataj kaj la modeloj estas sterilaj fariseoj, popolistoj, dubindaj artistoj kaj tiel nomataj celebruloj.
7. La impostoŝarĝo de la loĝantaro ĉiam kreskas kaj la ŝtato redistribuas neadekvate grandajn sumojn. La homoj ne timas ne labori, ĉar la ŝtato ĉiam iel prizorgos ilin.
8. La nivelo de la edukiteco rapide malkreskas.
9. La ŝtata ŝuldo kreskas ĝis neniam pagebla alto.
10. Oni ĉesas fabrikaj kaj kultivi, ĉar enlanda produktado estas multekosta, nutraĵoj kaj produktoj estas enportataj el la satelitaj landoj.
11. Kiu posedprenos postenon, kie li povas ŝteli ŝtatan havaĵon, tiu plejkaŭze faras tion. La ebleco de regreso – reveno estas tre malgranda.
12. Naskado kaj edukado de la infanoj estas konsiderataj kvazaŭ ĝenaj kaj la nombro de naskiĝantaj infanoj malkreskas.
13. Dum la jaroj atestitaj meĥanismoj gardantaj honestajn homojn kontraŭ friponoj subite fiaskas.
14. Publikaj funkcioj fariĝas objektoj de rabakiro, estas akirataj per monsubaĉetaĵoj, kaj kiu atingis ilin, volas rabakiradi, por ke la investita subaĉetaĵo kelkoble plialtiĝu al li.
15. Dum la jarcentoj de antaŭuloj testitaj valoraĵoj - kiel honoro, sento pri sia devo kaj respondeco, entuziasmo labori, bonfarado, laborfervoro por publikaĵoj estas primokataj.

16. Vastiĝas cinikismo.
 17. Vastiĝas malŝparado, malmodereco, malfamigado de la konoj, lertoj kaj de honesta laboro.
 18. En la landon venas multaj eksterlandanoj.
 19. Politikistoj entrudiĝas al aĉularo, kiu postulas amuzon kaj ŝtatajn subtenojn (panon kaj ludojn).
 20. La civitanoj pro ĉio ĉiam grumblas.
- Tiom Edward Gibbon en la jaro 1776 pri la falo de la Romana imperio.
 Ĉu tio ĉi almemorigas ankaŭ ion al vi? Josef Hron

Venu al Greziljono !

La franca Esperanto-kastelo Greziljono invitas vin al interesaj semajnoj:



somera programo (semajnoj turisma, art-amatora, alternativa, infana, teatra), aŭtuna feriado oktobrofine kaj al jarfina festego kun novjara festeno.

Vidu detalojn rete en

www.gresillon.org/somero aŭ
gresillon.org/agendo

Kontaktu nin telefone al +33-2.41.89.10.34 aŭ retletere al

kastelo@gresillon.org aŭ letere al MCE Grésillon, St.Martin d'Arce, 49150 Bauge en Anjou, Francio.

INFORMILO – monata gazeto por esperantistoj-handikapuloj + suplemento **ANTAŬEN**

Eldonas AEH – Asocio de esperantistoj-handikapuloj

Redaktoroj: J. Kosnar, J. Rýznarová, L. Srbová

Adreso: Svaz zdravotně postižených esperantistů, Na Okrouhlíku 953/21,

530 03 PARDUBICE, CZ tel. **466 611 941** SKYPE : jary_esperanto

e-mail: aeh-ikeh@volny.cz interreto: www.volny.cz/aeh-ikeh

Bankovní spojení: Poštovní spořitelna, číslo účtu AEH **192150088**, kód banky **0300**

Při platbách vždy uveďte vaše členské číslo (nad vaší adresou) jako variabilní symbol!

Roční předplatné časopisu Informilo= 200,-Kč, příspěvek svazu dobrovolný.

La jarabono de Informilo 15 €. Kodoĉe UEA : aehk-z

La redakcio ne ĉiam havas la saman opinion kiel la aŭtoroj de la artikoloj.